

Broj: 05-5178-9/22
Sarajevo, 03.02.2023. godine

Na osnovu člana 23. Zakona o Agenciji za bankarstvo Federacije BiH („Službene novine Federacije BiH“, broj: 75/17), člana 16. stav (1) tačka g) Statuta Agencije za bankarstvo Federacije BiH („Službene novine Federacije BiH“, broj: 3/18), člana 100. stav (3) Zakona o javnim nabavkama („Službeni glasnik BiH“, broj: 39/14), a po preporuci Komisije za nabavke, direktor Agencije za bankarstvo Federacije BiH donosi

ODLUKU o usvajanju žalbe i izboru ponuđača u postupku nabavke robe

Član 1.

Žalba ponuđača „IT Odjel“ d.o.o. Mostar broj 01-26/23 od 27.01.2023. godine izjavljena na Odluku o izboru najpovoljnijeg ponuđača u postupku nabavke softverskog rješenja za virtualizaciju servera i softver za nadzor LAN mreže za potrebe Agencije za bankarstvo Federacije BiH (u daljem tekstu: Ugovorni organ), broj 05-5178-7/22 od 16.01.2023. godine, *usvaja se u cijelosti.*

Stavlja se van snage Odluka o izboru najpovoljnijeg ponuđača u postupku nabavke roba, br. 05-5178-7/22 od 16.01.2023. godine, kojom je ugovor u postupku nabavke softverskog rješenja za virtualizaciju servera i softver za nadzor LAN mreže za potrebe Ugovornog organa dodijeljen ponuđaču „NEXIS“ d.o.o. Sarajevo.

Član 2.

Ugovor za nabavku softverskog rješenja za virtualizaciju servera i softver za nadzor LAN mreže za potrebe Agencije za bankarstvo Federacije BiH dodjeljuje se ponuđaču „IT Odjel“ d.o.o. Mostar.

Ukupna vrijednost ugovora iz utvrđuje se u iznosu od 43.000,00 KM bez uračunatog poreza na dodanu vrijednost (PDV), što sa uračunatim PDV-om iznosi 50.310,00 KM.

Član 3.

Nakon sticanja uslova Ugovorni organ će sa izabranim ponuđačem, iz člana 2. ove Odluke, zaključiti ugovor o nabavci roba, kojim će regulisati međusobna prava i obaveze.

Član 4.

Odluka će biti objavljena na internetskoj stranici Ugovornog organa: www.fba.ba, istovremeno sa upućivanjem iste ponuđačima koji su učestvovali u postupku javne nabavke, u skladu sa odredbama člana 70. stav (6) i člana 71. stav (2) Zakona o javnim nabavkama.

Član 5.

Za izvršenje ove Odluke zadužuje se i ovlašćuje Sektor zajedničkih funkcija.

Ova Odluka stupa na snagu danom donošenja.

OBRASLOŽENJE

Odlukom o pokretanju postupka nabavke roba, broj: 05-5178/22 od 21.04.2022. godine, odobreno je provođenje postupka javne nabavke softverskog rješenja za virtualizaciju servera i softver za nadzor LAN mreže za potrebe Ugovornog organa. Javna nabavka provedena je putem otvorenog postupka, a kao kriterij za izbor najpovoljnije ponude odabrana je najniža cijena. U skladu sa članom 35. Zakona o javnim nabavkama, Obavještenje o nabavci broj: 3010-1-1-398-3-53/22 objavljeno je na Portalu javnih nabavki (www.ejn.gov.ba) dana 08.12.2022. godine, a sažetak Obavještenja o nabavci u „Službenom glasniku BiH“, broj: 82/22 dana 16.12.2022. godine. Procijenjena vrijednost predmetne javne nabavke utvrđena je u iznosu od 43.000,00 KM, bez uračunatog poreza na dodanu vrijednost (PDV).

U skladu s Rješenjem Ugovornog organa, br. 05-5178-2/22 od 19.12.2022. godine, imenovana je Komisija za javne nabavke, kojim su definisane njene nadležnosti, a koje, između ostalog, uključuju poslove javnog otvaranja ponuda, pregled i ocjena dostavljenih ponuda, sačinjavanje zapisnika o pregledu i ocjeni ponuda, te davanje preporuke Ugovornom organu za donošenje odluke o izboru ponuđača.

Slijedom navedenog, Komisija je u okviru svojih nadležnosti i ovlaštenja provela predmetni postupak javne nabavke, te o tome sačinila Zapisnik o pregledu i ocjeni ponuda br. 05-5178-6/22 od 10.01.2023. godine, u kojem je konstatovano da su u predmetnom postupku javne nabavke pravovremeno pristigle ukupno 2 (dvije) ponude.

Na osnovu izvršene analize i ocjene pristiglih ponuda u pogledu kvalifikacijskih i cjenovnih uslova postupka javne nabavke, Komisija je utvrdila da ponude ponuđača „NEXIS“ d.o.o. Sarajevo i „IT Odjel“ d.o.o. Mostar su prihvatljive, obzirom da iste ispunjavaju sve uslove koji su propisani Tenderskom dokumentacijom te su dostavljeni svi dokazi zahtijevani Tenderskom dokumentacijom na propisan način.

Nakon odabira prihvatljivih ponuda, kvalifikovani ponuđači pozvani su da učestvuju u e-Aukciji na Portalu javnih nabavki, koju je zakazala Komisija, shodno članu 4. Pravilnika o uslovima i načinu korištenja e-Aukcije („Služeni glasnik BiH“, broj: 66/16).

U sljedećoj tabeli daje se rangiranje prihvatljivih ponuda nakon provedene e-Aukcije:

Redni broj	Ponuđač	Ukupna cijena, bez PDV-a
1.	„NEXIS“ d.o.o. Sarajevo	42.957,00 KM
2.	„IT Odjel“ d.o.o. Mostar	43.000,00 KM

Na osnovu provedenog postupka i preporuke Komisije iz zapisnika o pregledu i ocjeni ponuda, Ugovorni organ je donio Odluku o izboru najpovoljnijeg ponuđača, broj: 05-5178-7/22 od 16.01.2023. godine, kojom je ugovor po predmetnom postupku nabavke dodijeljen najpovoljnijem ponuđaču „NEXIS“ d.o.o. Sarajevo.

Po prijemu Odluke o izboru najpovoljnijeg ponuđača, drugorangirani ponuđač „IT Odjel“ d.o.o. Mostar izvršio je uvid u ponudu izabranog ponuđača, te podnio Žalbu na Odluku o izboru u predmetnom postupku javne nabavke, broj: 01-26/23 od 27.01.2023. godine (u daljem tekstu: Žalba), zaprimljena 30.01.2023. godine kod Ugovornog organa.

Po prijemu predmetne Žalbe, Ugovorni organ je konstatovao da su ispunjene zakonske pretpostavke za razmatranje iste, obzirom da je Žalba dopuštena, blagovremena i da je izjavljena od ovlaštenog lica u skladu sa članom 100. stav (1), te je Ugovorni organ obavijestio učesnike u postupku o obustavi postupka do donošenja konačne Odluke po Žalbi.



Žalbeni navodi ponuđača "IT Odjel" d.o.o. Mostar, glase:

„Na odluku ugovornog tijela, Agencije za bankarstvo FBiH, broj 05-5178-7/22, koja Odluka je dostavljena dana 23.01.2023. godine, blagovremeno se dostavlja žalba, i to zbog:

- Pogrešno i nepotpuno utvrđenog činjeničnog stanja
- Pogrešne primjene materijalnog propisa
- Bitnih povreda odredbi Zakona o javnim nabavkama i Zakona o upravnom postupku

Sa prijedlogom da ugovorno tijelo, temeljem odredbe članka 110. Zakona o javnim nabavkama, odgodi nastavak postupka javne nabave dok se, uvaži žalba žalitelja i izmijeni pobijanu Odluku na način da se kao najpovoljniji ponuditelj izabere žalitelj ili pak da Ured za razmatranje žalbi BiH uvaži žalbu, poništi pobijanu Odluku i sam riješi ovu pravnu stvar na način da se ugovor dodijeli žalitelju ili da se predmet vrati na ponovni postupak uz obavezu da se žalitelju nadoknade troškovi postupka prema troškovniku koji se dostavlja.

O b r a z l o ž e n j e

Ad 1. Ugovorno tijelo je poniženom odlukom o izboru najpovoljnijeg ponuđača broj 05-5178, prihvatilo prijedlog komisije za javne nabavke i Ugovor za nabavku softverskog rješenja za nadzor LAN mreže za potrebe Agencije za bankarstvo FBiH dodijelilo ponuđaču NEXIS d.o.o. Sarajevo, čija je ponuda proglašena najpovoljnijom.

Na temelju zahtjeva podnositelja žalbe, dana 25.01.2023. godine izvršen je uvid u ponudu izabranog ponuđača.

Pobijana Odluka ugovornog tijela je nastala kao rezultat gore pobrojanih povreda, te je kao takva pravno neodrživa.

Ad 2. Iz ponude izabranog ponuđača vidljivo je, da je ponuđena Vmware licenca za virtualizaciju servera. Također je vidljivo da ponuđan PN:F6M49A, WMw vSph EssPlus Kit 6P 3y SW, dakle radi se o HPE Part Number-u i u tom slučaju support za L1 i L2 obezbijeđen je od strane HPE a ne od Vmware, shodno tome korisnik isključivo komunicira sa supportom HPE. Ugovorno tijelo je u tehničkoj specifikaciji izričito tražilo da za ponuđenu licencu je potrebno obezbijediti tehničku podršku direktno od proizvođača software-a, stoga je izabrani ponuđač morao ponuditi i Wmware podršku. Budući da je izabrani ponuditelj ponudio Vmware licencu a podršku od HPE-a, shodno prednjim navodima izabrani ponuditelj nije ispunio tražene uvjete iz tehničke specifikacije ugovornog tijela.

Ad 5. Budući da se izabrani ponuđač nije pridržavao uvjeta i zahtjeva tenderske dokumentacije, ugovorno tijelo bi trebalo primijeniti točku 2.3 tenderske dokumentacije, u kojoj je navedeno da ponuđena roba mora zadovoljavati sve navedeno u Aneksu 4 (tehnička specifikacija), a sve u skladu sa članom 68. zakona o javnim nabavkama.

Ad 6. S obzirom na sve navedeno, kako je očito da je pobijana odluka ugovornog tijela protivna odredbama zakona o javnim nabavkama i Zakona o upravnom postupku, jer ponuda izabranog ponuditelja nije bila prihvatljiva i nije ispunjavala sve zahtjeve iz tenderske dokumentacije ugovornog tijela, predlaže se da ugovorno tijelo, odnosno Ured za razmatranje žalbi BiH, žalbu uvaži, pobijanu odluku poništi i preinači na način da se predmetni ugovor dodijeli žalitelju budući da su za to ispunjene zakonske pretpostavke ili pak da predmet vrati na ponovni postupak, uz obavezu da se nadokande troškovi postupka podnositelju žalbe prema troškovniku koji se dostavlja.

Podnositelj potražuje troškove na ime naknada za pokretanje žalbenog postupka po određenju URŽ-a.,,

Komisija za provođenje predmetnog postupka nabavke je po prijemu uložene Žalbe izvršila detaljnu analizu navoda iz Žalbe, te u skladu sa članom 100. stav (3) Zakona o javnim nabavkama utvrdila da je žalba u cjelosti *osnovana, te predložila donošenje Odluke o usvajanju žalbe.*

Naime, Komisija za javne nabavke u toku pregleda i ocjene ponuda nije izvršila adekvatnu kvalifikaciju ponuđača, tako što je prihvatila ponudu ponuđača „NEXIS“ d.o.o. Sarajevo, iako ista nije ispunila sve uslove koji su propisani Tenderskom dokumentacijom, a koji se odnose na Tehničku specifikaciju – Aneks 4, i na tačku 2.3. Tenderske dokumentacije kojom je navedeno da ponuđena roba mora zadovoljavati sve navedeno u Aneksu broj 4., a na što je žalitelj ukazao u podnesenoj Žalbi.

Tehničkom specifikacijom - Aneks 4., koja je sastavni dio Tenderske dokumentacije u predmetnom postupku javne nabavke zahtijevano je da je za ponuđeno softversko rješenje potrebno obezbijediti



tehničku podršku u trajanju od 3 godine, koja uključuje 24-satnu telefonsku podršku, direktno od proizvođača software-a, i pravo na instalaciju novih verzija software-a tokom perioda podrške. U skladu sa navodima Žalbe, te provjerom istih kod ovlaštenog distributera softvera, utvrđeno je da ponuđeno softversko rješenje u Ponudi izabranog ponuđača „NEXIS“ d.o.o. Sarajevo, a prema dostavljenom part Number-u, broj: PN:F6M49A, WMw vSph EssPlus Kit 6P 3y SW ne podrazumijeva direktnu podršku od proizvođača software-a, nego od HP-a.

Temeljem naprijed navedenog, Ugovorni organ je ponovnim pregledom i ocjenom navedene ponude ocijenio da se ponuda ponuđača „NEXIS“ d.o.o. Sarajevo odbacuje kao neprihvatljiva, obzirom da ista ne ispunjava sve zahtjeve koji su navedeni u Tehničkoj specifikaciji – Aneks 4. Tenderske dokumentacije

Sve navedeno je moguće provjeriti putem zvanične podrške proizvođača softvera, a što je Ugovorni organ i učinio prilikom razmatranja Žalbe.

Dakle, uvidom u priloženu dokumentaciju i provjerom navoda Žalbe ustanovljeno je da je ponuda ponuđača „NEXIS“ d.o.o. Sarajevo neprihvatljiva, stoga se stavlja van snage Odluka o izboru najpovoljnijeg ponuđača u postupku nabavke roba, broj: 05-5178-7/22 od 16.01.2023. godine.

Obzirom da je u navedenom postupku javne nabavke ponuda ponuđača „IT Odjel“ d.o.o. Mostar ocijenjena kao prihvatljiva, to se ugovor dodjeljuje navedenom ponuđaču kao jedinom prihvatljivom ponuđaču u ovom postupku javne nabavke.

Ugovorni organ nije razmatrao naknadu troškova u ovom postupku po žalbi, obzirom da u podnesenoj žalbi nije dostavljen troškovnik za nadokandu visine troškova a kako je navedeno u Žalbi.

Uvažavajući sve navedeno, odlučeno je kao u dispozitivu ove odluke.

POUKA O PRAVNOM LIJEKU:

Protiv ove Odluke može se izjaviti žalba Uredu za razmatranje žalbi/Kancelariji za razmatranje žalbi – Filijala/Podružnica Mostar, **putem ugovornog organa**, u pisanoj formi, direktno ili preporučenom poštanskom pošiljkom u roku od 5 (pet) dana od dana prijema Odluke, a sve u skladu sa članom 100. stav (4) Zakona o javnim nabavkama.



Dostaviti:

1. Ponuđačima u postupku;
2. a.a.

